

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : YB DATUK AARON AGO DAGANG[KANOWIT]

TARIKH : 10 OKTOBER 2019 (KHAMIS)

SOALAN

Minta **MENTERI HAL EHWAL EKONOMI** menyatakan apakah pandangan Kerajaan terhadap isu kemiskinan di Malaysia terutamanya dari segi indeks dan peratusannya yang mencerminkan keadaan sebenar kemiskinan dan tahap hidup rakyat kita di Malaysia.

JAWAPAN

Tuan Yang di-Pertua,

1. Sepertimana Ahli Yang Berhormat ambil maklum, YAB Perdana Menteri telahpun menyatakan pendirian Kerajaan berkenaan pandangan Pelapor Khas Pertubuhan Bangsa-bangsa Bersatu (PBB) Berhubung Kemiskinan Tegar dan Hak Asasi Manusia dalam sidang Dewan yang mulia ini pada 7 Oktober 2019 yang lalu.

2. Kerajaan maklum akan usaha dan mandat Pelapor Khas Pertubuhan Bangsa-bangsa Bersatu Berkenaan Kemiskinan Tegar dan Hak Asasi Manusia (Pelapor Khas PBB) dalam melaporkan keadaan kemiskinan dan hak asasi serta cadangan dasar bagi menambah baik kemiskinan di Malaysia namun perlu dijelaskan di sini bahawa kadar kemiskinan rasmi di Malaysia dikira berdasarkan cerapan data Tinjauan Pendapatan Isi Rumah (HIS – Household Income Survey). Ia dilakukan mengikut piawaian amalan antarabangsa yang diselenggara oleh Bahagian Statistik PBB (UNSD – United Nation Statistic Division).

3. Sehubungan itu, perangkaan kemiskinan daripada HIS masih relevan dan boleh dipercayai pada peringkat penilaian makro. Namun, pada peringkat yang lebih mikro seperti negeri atau daerah, perangkaan HIS perlu diguna secara berhati-hati kerana ia tidak menggambarkan corak penggunaan, keperluan serta demografi sebenar isi rumah berikutan ralat persampelan yang tidak boleh dielakkan.
4. Dalam Kajian Separuh Penggal Rancangan Malaysia Ke-11, Kerajaan telah memperkenalkan Indeks Kemiskinan Pelbagai Dimensi (*MPI – Multi-Dimensional Poverty Index*). Ia sebagai pelengkap kepada PGK untuk mengukur dan memantau kemiskinan dalam perspektif pelbagai dimensi yang merangkumi kesihatan, pendidikan, pendapatan dan taraf hidup. MPI ini dilihat lebih inklusif selaras dengan amalan antarabangsa.
5. Kerajaan bersedia untuk menyemak semula PGK ini bagi memberi gambaran sebenar isu kemiskinan di Malaysia. Namun apa yang lebih penting adalah usaha-usaha pembasmian kemiskinan dilaksanakan secara berterusan dan efektif.
6. Antara usaha yang telah dan sedang dilaksanakan oleh Kerajaan ialah dengan mengemaskini dan menambah baik sistem eKasih yang menjadi pangkalan data kemiskinan nasional. eKasih akan turut mengambil kira bilangan ahli dan keperluan isi rumah supaya pemberian bantuan menepati keperluan dan kumpulan sasar. Mekanisme pengumpulan data dan formulasi strategi juga akan ditambah baik dengan memanfaatkan perkembangan teknologi terkini.
7. Strategi utama Kerajaan dalam membasmi kemiskinan adalah melalui usaha meningkatkan pendapatan dan kuasa beli rakyat terutamanya dalam kalangan isi rumah miskin dan berpendapatan rendah. Antara bantuan kepada kumpulan sasar ini termasuklah Bantuan Sara Hidup, kemudahan pemilikan perumahan, akses kepada pendidikan dan kesihatan yang berkualiti. Usaha-usaha ini akan dapat memastikan setiap isi rumah diberi perhatian sewajarnya sejajar dengan konsep pembangunan inklusif Wawasan Kemakmuran Bersama 2030.

Sekian, terima kasih.